

Perlu perjuang bangsa, agama

Oleh AQILAH MIOR
KAMARULBAID

pengarang@utusan.com.my

KUALA LUMPUR 17 Okt. - Barisan kepimpinan baharu Majlis Perwakilan Pelajar (MPP) Universiti Putra Malaysia (UPM) perlu menjadi aset penting kepada kelangsungan perjuangan bangsa dan agama.

Naib Canselor UPM, Datuk Ir. Dr. Radin Umar Radin Sohadi berkata, MPP juga perlu berperanan membantu dan menjadi wadah proaktif serta progresif kepada pihak pentadbiran universiti dalam menjaga dan membangunkan kebijakan penuntut.

Tambahnya, sebagai badan yang dekat dan mewakili penuntut universiti, MPP wajar bekerjasama dengan organisasi penuntut lain seperti Majlis Tertinggi Pelajar Kolej dan persatuan atau kelab untuk mendapatkan pandangan dan maklum balas.

"Jaringan kerjasama kepimpinan itu sewajarnya mencetuskan tindakan berkesan dalam menangani isu kebijakan dan keperluan pelajar kampus," katanya ketika berucap dalam majlis Watikah Pelantikan MPP UPM, di sini hari ini.

Jelasnya, barisan MPP mungkin tidak berpeluang menikmati hasil yang diperjuangkan mereka tetapi

jasa dan bakti itu akan dikenang dan mendatangkan banyak manfaat kepada penuntut lain.

Sebagai contoh, katanya, kewujudan Kompleks Mahasiswa UPM yang baharu adalah hasil kerjasama dan perjuangan permufakatan bijak antara Bahagian Hal Ehwal Pelajar dan bekas MPP UPM sebelum ini yang mana ada dalam kalangan mereka tidak berkesempatan menikmati usaha mereka sendiri.

Tambahnya, UPM juga mahukan barisan MPP baharu menilai sesuatu perkara secara realistik dan sedar tidak semua tuntutan dapat dipenuhi sekilip mata.

"Ada perkara yang menyentuh isu kebijakan penuntut dapat diselesaikan dengan segera dan ada sebahagiannya memerlukan perancangan teliti serta tempoh tertentu untuk diselesaikan," jelasnya.

Beliau menambah, MPP kali ini perlu mengubah minda dari segi perancangan, pengurusan strategi, program dan mekanisme pelaksanaan dalam membantu menangani masalah kebijakan pelajar.

"Saya berharap akan ada reformati berkesan terhadap cara dan pendekatan MPP dalam membantu isu dan konflik penuntut di kampus tahun ini," katanya.



YANG Dipertua MPP, Ahmad Bukhari A. Rahim (kiri) menyatakan sesuatu kepada Radin Umar Radin Sohadi sambil diperhatikan oleh ahli majlis perwakilan yang lain selepas Majlis Pelantikan Watikah MPP di UPM Serdang, semalam.
- UTUSAN/ ABDUL NAZIR MOHAMED